

秀山縣志卷弟十三

土官志第十

寥乎梁荆之交有地廣袤方數百里荒蔚阻幽秦漢以降挂名  
虛版稀睹長吏履行之迹宋興始以土酋領職漸顯官號而世  
世相承別異中區歲略貢納品物寡嗇示朝廷有此土而已于  
時種落豪長楊田彭向稱大姓而楊氏尤彊其先蓋唐誠州刺  
史楊再思之苗裔誠州于今爲靖州地州故多蠻再思播宣威  
惠得民夷心州西北有飛山俗名勝山峻盤千仞崇崖四遭蠻  
人嘗嬰此自固號飛山蠻再思討蕩略盡悉有其險事具前史  
至今谿洞祠祀再思咸稱飛山神廟云再思旣威行夷落殊種  
畏懷子孫習安其土滋生緜衍遂世爲西南徼人七世孫曰再

卷十三

土官志

一

西宋孝宗隆興元年襲先職爲思州沿邊萬戶都總管淳熙八  
年開地省溪通邏銅仁及川東安彝等處再西卒子正強襲總  
管第二子正遷銅仁勤番千戶尋改進義司長官少子正綱駐  
牧通邏岑江游獵自娛不希榮仕正綱子通晟字思古性沈毅  
識略過人征苗積功授乜八孟溪土同知理宗淳佑十二年卽

二十八年

第五元 平茶邑梅石耶諸洞苗夷內訌尋仇糾殺其時中國

偏于北虜不遑南嚮措意孟溪旣比壤密近通晟迺率諸子督  
兵討之通晟諸子皆能而光輔尤材武光隆光彤光貴才稍下  
頃之諸洞以次略定遂盡有其地于是邑梅編戶五里光輔領  
之平茶編戶三里光彤領之石耶編戶二里光隆領之光貴無  
分戶與以清水高寶諸地資其畜牧清水高寶卽今南邱忙表

也明太祖洪武七年分平茶地置溶溪芝蔴子坪長官司以光貴裔孫世榮爲長官後隨右將軍西平侯沐英征雲南積功授宣慰司辦事長官世宗嘉靖二十五年溶溪石皮呂龍麻五姓苗爲亂長官不能制屢爲所偏則遷居上濟里以避之于是遂罷溶溪芝蔴子坪長官司自洪武七年置司至此凡得一百八十三年或曰遷上濟里者爲世榮五世孫尋授貴州水德司副長官傳聞異辭所未詳也邑梅地廣百里袤二百三十里其人異語蠻音好着班布衣勇悍喜私鬪舂稻米鑿白木槽爲臼瀝取苦蒿水代鹽以鮮宿肉以爲珍味其俗尙巫疾病不事醫藥邀蠻巫至家吹角烏烏咒辭啁晰病亦尋瘳昏姻率以牲口爲禮牛隻多寡各有等差其東南密邇鎮溪苗鈔暴無常故時有

卷十三

土官志

二

疆場之警焉平茶地廣六十里袤一百五十里所屬有五種夷言語侏僂性好捕獵戶緝野麻爲布四時着之山谷多陰雨秋穫則築火坑焙穀親死亦知號叫哭泣旣斂卽葬送者歌唱襍沓抑揚激楚頗有聲節亦古人紼挽之遺也治疾以巫祝與邑梅同俗石耶地廣袤道里未聞舊俗略同邑梅惟人好佩長刀喜捕獵家織班布散賣諸落以爲恆業前史稱荊州沅陵諸蠻本其所出承槃瓠之後故章服多以班布爲飾今邑梅石耶二洞之人竝喜裁班布以爲衣袴則亦地近習漸故轉相慕效以成風俗也光輔光彤光隆旣世長三洞明成祖永樂初又分石耶置地壩洞副長官司仍以光隆裔孫正文爲副長官時號四洞長官司垂世各數百年首尾四朝前各志旣悉依年斷靡所

廁係而又未在離絕之科故別出爲土官篇然其事多亡失謹籍荒殘今所采集才得十一焉

### 邑梅洞

楊光輔字高殿通晟長子也周宣王時封子尙父于楊號楊侯後其地爲晉所併子孫因以邑氏焉有楊食我者爲晉大夫秦時有將軍楊端和自漢以來世爲著姓唐則楊再思爲誠州刺史光輔爲再思十世孫驍果多機略宋理宗淳佑十二年隨父略定邑梅等處苗夷推鋒直進所嚮破散遂盡有阿魯地顛偏溪絞七寨蠟寅把俊倍勇士牙阻化濟方二百里之地因置邑梅宣化軍民府治阿魯光輔自爲知府于是蓋造官舍綏集流亡民夷懷服時元兵南擾江淮騷然光輔議遣表與朝廷相聞

### 卷十三

### 土官志

### 三

道授未能自達在官二十年度宗咸淳八年九月卒年五十九子昌談襲昌談字于量襲官九年宋亡元成宗大德六年即位弟二大用兵西南夷因詔經理諸邊改邑梅洞曰佛鄉洞仍知府舊號授昌談佛鄉洞土知府在官四十九年卒有子二人長勝剛蚤死其子竝幼次子勝強襲武宗至大中進階中憲大夫勝強卒勝剛子秀琉襲秀琉卒子再萼襲再萼卒子正天襲正天一名金奉元季政荒民亂順帝至正十一年即位十九年穎州劉福通蕭縣李二羅田徐壽輝等各起兵破陷州縣十七年壽輝將明玉珍據成都遂有全蜀二十三年玉珍稱帝成都國號夏改元天統是時朱元璋張士誠陳友諒各擁眾數萬往來江淮間故玉珍得閉關休息正天既送款成都玉珍乃改佛鄉洞

爲邑梅沿邊溪洞軍民府授正天仍爲土知府明太祖洪武四年征西將軍湯和征虜將軍傅友德帥師伐蜀時玉珍已死子昇嗣僞位六月昇降于和封歸義侯蜀平邑梅以納土遲罷土知府官尋詔置邑梅長官司授楊金奉爲長官頒惟字七十二號印信一枚救命一通及紗帽銀帶十年金奉卒無子以弟正道子通寶襲遷治凱堡亦曰凱子若惠帝建文元年通寶卒子光宣幼勝強四世孫通賢逐光宣自爲長官還治阿魯光宣匿外舅吳再章家通賢捕治急則攜弟光台從再章亡命入播州

一譜載勝強卒子秀祿襲秀祿卒子再成襲再成卒子通賢襲按此當是通賢奪襲後所追改本也先是邑梅隸

西陽宣撫使司成祖永樂初改屬重慶衛特賜長官敕書以重職守邑梅故無城通賢發役興築周迴數里後阻重阜前交二

卷十三

土官志

四

川形勢益勝由此頗與西陽構隙八年宣撫使冉興邦潛兵襲城殺通賢及男婦九十三口通賢子光興光義間關走京師愬狀事下錦衣衛遂逮興邦抵罪于塔發戍遼左命光興襲長官光興以父枉死在官絕游娛罷權款既卒無子弟光義襲英宗正統十四年貴州苗叛四出鈔暴詔以王驥充總兵官帥師討之邑梅比近苗居日有警聞光義乃料軍實起斥堠卒以有備得無侵掠司境多山土地磽瘠光義薄減徭賦俾民蘇息復出私錢數十萬振卹羸弱遠近謳歌大順英宗復位改元四年卒子昌榮襲憲宗成化二十二年昌榮卒子勝剛襲勝剛扇結諸洞圖危西陽俊倍洞長官楊光震明史土官傳作廣震爲其腹心于是宋農后溪蠻獠一時響應肆行焚劫孝宗宏治七年保靖宣慰使彭世雄

永順宣慰使彭萬潛竝上其事兵部議稱酉陽溪洞連絡最易扇動宜時撲滅請行鎮巡官審機剿撫頃之悉平九年勝剛卒子秀璿襲十四年普安苗婦米魯作亂詔酉陽邑梅平茶石耶諸洞土兵從南京戶部尙書王軾討之十五年七月禽斬米魯武宗正德三年湖廣鎮溪諸苗溪入攻劫秀璿請兵剿捕十一年秀璿卒子再輝襲十四年再輝卒子正公襲世宗嘉靖二十一年詔改九永守備官駐施州衛約束散毛等司蠻兼制酉陽及邑梅諸洞二十九年鎮溪苗復入陷城正公走免湖廣都指揮使孫賢檄大田千戶楊秀權帥兵挾援禽其渠龍朴業斬之正公卒子通承襲通承卒無子以弟通祖子光斗襲光斗字北樞神宗萬曆二十一年貴州紅苗爲亂率眾來犯光斗督兵擊卻

卷十三

土官志

五

之二十五年播州宣慰使楊應龍叛詔以李化龍總督諸軍入討光斗與石駐宣撫使馬千乘酉陽宣撫使冉御龍平茶長官楊光祖竝隸總兵官馬孔英化龍議分八路入播州孔英由南川進連有斬獲時官土兵數萬軍容甚盛諸土官尤銳厲故南川軍最先諸路入關二十八年六月播州平光斗以功進散官一階賞穿二品服勅書獎勞二十七年承檄將邑梅兵援遼陽授京營參將左軍都督僉事懷宗崇禎十七年光斗倦于位命子昌厚襲官是歲明亡昌厚字義極性愛墳典嘗假思南籍補府學生員至是襲長官司時明諸王各據土稱帝號召海內朱由榔永歷元年傳檄溪洞諸洞土官竝有遷階昌厚授都督僉事同知四年前長官光斗卒年七十三俄昌厚亦卒子勝皞襲

國朝順治十五年大兵略定雲貴由榔走死有詔諸洞土官無改舊職仍許世世承襲明制諸土司並隸都指揮使至是改屬布政使司會吳三桂叛雲南道路梗塞康熙二十一年始頒給印信號紙一如舊制勝皞卒子秀夫襲秀夫卒子再相襲再相卒子正位襲正位字中贊雍正十二年從征古州苗甚著戰績時西陽宣慰使冉元齡容美宣慰使田啟如均以不灑爲邊民控愬

朝廷銳意經營西南土夷遂有改流之議湖廣之永順保靖桑植容美四司既先後開置府縣十三年西陽宣慰使冉廣烜以庶孽冒襲嫡子廣杰訟之布政使而西陽民復列上冉氏諸貪暴狀于是遷廣烜廣杰于浙江罷西陽宣慰使司正位自請繳

卷十三

土官志

六

還邑梅長官司印與平茶石耶地壩三洞一時並省自宋淳佑十二年楊

光輔起訖于雍正十三年楊正位止凡二十世二十一人四百八十五年

邑梅原管番民八十四戶額載新舊秋糧四十八石三斗七升

每斗折徵銀四分二釐五毫共折徵銀二十兩零一錢三分二

釐三毫五絲其屬有俊倍洞副長官司初光輔第三子昌斌以功授俊倍土千戶後改

副長官司按明史土官傳有俊倍洞長官楊廣震光輔第二子絞也土千戶昌斌以功授馬蹏溪千

戶明永樂時置以光輔六世孫通廣鴛鴦嘴司務昌斌置以子

國字城牙阻邊蠻總管昌斌五世孫通牙阻各戶請立頭領因省司務

置牙阻邊蠻總管皆楊氏世官

平茶洞

楊光彤字大雷通晟第二子也初宋徽宗政和四年即位十四年弟四元

平茶內屬置平茶洞俄復陷于蠻前史稱酉陽有三種夷曰狇  
獠曰南客曰冉家南客一種則多散處于平茶其大姓伍龍舒  
向言語侏儻自爲族類今平茶里有南客子其遺裔也光彤既  
從父兄剿平邑梅等處苗夷因略地平茶西屆烏羅南迄銅仁  
東北盡于酉陽悉爲所有理宗寶祐元年卽位二十九年  
弟六元以平茶  
洞爲平茶承化軍民府光彤自爲知府光彤卒子昌蘭襲昌蘭  
卒子勝都襲元初清釐諸邊罷平茶土知府置溶江芝子平茶  
等處長官司隸思州安撫使司仍以勝都爲長官勝都卒子秀  
畱襲先是勝都爲酉陽冉氏所害乳媪負秀畱匿民間得不及  
難其後族人共偵獲之乃還襲職秀畱卒子再興襲再興當元  
明鼎革之際寇盜蓬起明玉珍據蜀酉陽宣慰使冉如彪邑梅

卷十三

土官志

七

土知府楊正天竝送款成都再興厲兵扞境深拒僞命明太祖  
洪武初東南大定再興納土歸誠改溶江芝子平茶等處長官  
司爲平茶長官司別置溶溪芝蔴子坪長官司竝隸酉陽宣撫  
使司尋改屬重慶衛十七年以平茶爲直隸長官司隸四川布  
政使司覲貢賦稅略同酉陽按明史土官傳洪武初置平茶洞  
長官司以楊底綱爲之底綱疑卽  
再興之字納款時以字行故史據以載也  
或曰再興一名底綱謹牒荒略莫由審正再興卒子正賢襲初

正賢未襲職再興弟再勝署長官二十二年潛謀殺正賢及楊  
通保等事覺正賢走京師愬其事且上再勝與景川侯謀反狀  
詔逮再勝鞠問辭服當族誅正賢亦應緣坐于是旣誅再勝正  
賢以首難予免使還襲官成祖永樂四年歲大早有詔免酉陽  
平茶等司荒田租正賢卒子通恆襲通恆卒子茂襲武宗正德

十一年調平茶土兵從征叙州叛蠻十三年隨剿茂州番茂以功授懷遠將軍茂卒子殷襲殷卒子均位襲均位卒無子弟均佑襲均佑卒子秀廷襲秀廷從討貴州亂苗有功授武德將軍秀廷卒子再顯襲明中葉後嘗有事於遼東諸司洞土兵不時調發再顯應檄援遼累功授武略將軍世宗嘉靖十五年從討真州蠻尤著戰績爲朝廷倚重凱還卽解兵歸里後數年遼兵復擾再顯奉調往征積勞成疾沒於遼之軍次再顯卒子正崧先嘗占銅仁籍中貴州武解元至是以子通一襲職二十八年從征湖廣蠻尋奉調剿四川土寇攻平支羅等砦通一卒子光祖襲神宗萬曆元年隨大軍討平馬湖蠻平茶土兵驍果善戰時稱勁旅故所嚮輒有功十四年楊柳疊溪羌亂將軍李應祥

請調土官楊應龍冉維屏楊光祖將播州酉陽平茶諸兵進討未幾諸羌悉平楊應龍反播州二十七年光祖從總督李化龍進討明年播州平光祖以功授明威將軍忠順大夫光祖卒子昌允襲熹宗天啓元年四川永甯土官奢崇明反二年貴州水西土目安邦彥反昌允竝從征討連有功授龍驤將軍尋奉檄剿捕河南湖廣流寇俘斬甚眾六年貴州紅苗滋衅鈔暴思銅間軼犯平茶昌允率眾堵禦築太平新營龍頭百占革回五營扼險自守苗尋遁還昌允卒子勝吉襲初勝吉從父剿流寇于承天府以驍敢聞授京營參將未幾明亡永曆初授勝吉恢剿漢羌等處總兵官尋授思沿都總管平夷將軍時紅苗閒出剽劫勝吉復扼太平等營堅壁自守苗無所掠而還勝吉卒子再



璜襲再璜卒子正樂襲雍正十三年司裁

自宋寶祐元年楊正

楊正樂山凡十八世十  
九人四百八十四年

平茶原管番民百戶額載新舊秋糧二百五十四石一斗五升折銀斗徵四分凡徵銀一百一兩六錢六分其屬有客寨副長

官司

楊光彤七世孫通泰明永樂時以  
功授副長官建司客寨遂爲世職

石耶洞

楊光隆通晟第三子也性疏豪喜言兵怡怡昆季間意恢如也時邑梅平茶石耶三洞山林初啓諸務草創頃之以石耶爲順德軍民府貢賦征徭事益猥襍光隆厭其煩不樂洞職一委之其子昌安暇則登高臨水獵射自娛自少未嘗涉書史然其論究古今成敗頗能得其要領大人耆老嘗稱之年八十五卒子

卷十三

土官志

九

昌安襲土知府昌安慎密多機謀以平蠻功加授忠順大夫早涉洞務益資練習和輯夸獠邊人尤懷之昌安卒子勝平襲勝平卒子秀福襲秀福卒子金龍襲是時元亡僞夏據成都建元天統明太祖方有事河朔未能致討石耶故蜀徼金龍雖未送款玉珍然頗爲所牽綴及湯和平蜀始獲歸附時洪武十又五年也由是議罷土知府置石耶洞長官司賜勅書頒下惟字七十二號銅印一方朝覲勅諭一軸以朝貢未能親如京師命附庸酉陽永樂四年貴州黑苗叛據岑峇金龍率厲土兵曲厯艱險一戰克之未幾卒子正宗襲正宗卒子通俊襲通俊卒子光勝襲光勝卒子廷忠襲廷忠卒子勝山襲勝山卒子秀祖襲秀祖卒子仁襲仁字鹿溪仁卒子正魁襲正魁字少微以戡定苗

峒功加授都督同知卒贈宣慰司使子通運襲通運字春寰神宗萬曆二十七年詔從西陽邑梅平茶諸司率土兵援遼陽奉集之役戰績最著進授右軍指揮加宣慰使銜尋以積勞卒於軍贈金吾將軍子光郁襲光郁字華嶽萬曆廿八年總督李化龍率官土兵征播州光郁自備糗糧鼓行爭先天啓三年復徵討貴州三山紅苗授援黔副總管加宣慰使銜懷宗崇禎九年凱還卒子昌統襲昌統字繩可先是鎮溪苗叛石耶被檄徵兵光郁時猶畱剿三山昌統乃代父往往征尋奉調移兵防禦淮安所在有功及襲洞職值明亡永曆二年四川巡按錢邦芑奏擢昌統爲江南狼山鎮總兵官加太子少保都督同知銜卒葬狼山子勝美襲勝美字如文當昌統駐狼山時勝美守洞事邊圉輯謐旣襲職數年孫可望入黔頒僞印招令臣附勝美已先於順治三年具上地圖遣表如

卷十三

土官志

十

都值恭順王駐師湖廣暫給知照着仍襲舊職十五年繳上僞印康熙元年疆臣疏請安頓諸洞土官兵部覆准石耶承襲一如明制吳三桂叛雲南道路梗絕二十年始頒給石耶洞長官司印並號紙一張加授勝美都督同知銜勝美卒子秀瑛襲秀瑛卒子再鎮襲雍正十三年與邑梅平茶地壩諸司一時並裁賞石耶土千總世世承襲自宋理宗時楊光隆起訖雍正十三年楊再鎮止凡十九世十九人四百八十餘年

石耶舊管番民十戶額載新舊秋糧四十三石七斗五升九合折銀斗徵四分凡折徵銀十七兩五錢三釐六毫其屬有寨婁

千戶 宋理宗時楊光隆第二子昌牧以功授 絞婁千戶 楊光隆五世孫

正榮以征湖廣溪蠻投此職後為世官 國初改屬西陽宣慰使司

地壩洞者石耶分地也初楊光隆第三子昌戴駐牧地壩其五

世孫曰正文當明永樂時從西陽冉司使朝覲如京師授副長

官尋以從討湖廣溪蠻有功石耶長官楊正宗為請割地置地

壩副長官司准世襲如石耶正文卒子通謙龍通謙卒子杠襲

杠卒子昌豫襲昌豫卒子應宗襲應宗卒子秀峙襲秀峙卒子

再欽襲再欽卒子正枝襲正枝卒子通爵襲通爵卒子光同襲

順治十六年款附延遲部册無名未給印信號紙然光同仍為

副長官隸西陽宣慰司光同卒子昌基蚤死以孫勝均襲雍正

十三年獻土司裁 自明永樂時楊正文起訖雍正十三年楊勝均止凡十一世十一人三百四十餘年

卷十三 土官志 十一

地壩舊管番民二百廿戶額載新舊秋糧六十八石八斗折銀

斗徵四分凡徵銀二十七兩五錢二分其屬未聞

楊通沾字宇蒼邑梅洞人也明萬曆時舉人從征水西有功授

柏楊營總兵通沾明毅有將才晚年致仕歸田結廬黃牛山下

讀書自樂年七十餘卒明時洞司人士以科目顯者有楊燦楊

通全楊正崧燦自有傳通全正崧皆武舉通全仕至總兵

楊光謙字和甫平茶洞人也性豪宕少有大志喜讀兵書明熹

宗天啓二年水西土目安邦彥反光謙從大軍攻討屢有斬獲

丁國祥者土酋丁某女也膂力兼人尤多智計悅光謙奇偉設

伏生禽之白主將求為夫婦相得甚懽久之光謙語丁曰吾儕

皆明臣子背主負恩山林為盜非善計也丁領之遂自拔偕歸

明是時流寇從橫海內崩裂光謙所部稱勁旅累功授總兵未幾明亡朱由榔稱號肇慶光謙夫婦復往依之嘗偕武邦賢解貴陽之圍尋以國祥領征西軍光謙副之從武陵侯楊國柱守武岡國朝順治十五年天下大定由榔走緬甸光謙因偕國祥詣信郡王乞降拘禁累年吳三桂叛雲南所在騷動夫婦乘間遁還平茶康熙時卒

楊通堯邑梅洞人警敏有志操明末襲父職爲大田所千戶奢崇明據重慶爲亂大兵四集監軍檄通堯之衢州督運軍實以功擢指揮使僉事崇禎十七年大田蠻叛鈔暴日甚通堯率所部士兵五百人親出捕討轉戰山峒間流血霑足俄被重創死

卷十三

土官志

十二

之還葬邑梅以明亡無贈卹至今鄉氓耆老猶相謂曰忠義千戶云

楊通靈通堯從弟也從討大田蠻力戰被傷幾仆其僕負之突圍走還逾時卒僕負其屍晝夜兼行至邑梅之鄧橋亦力竭死焉

楊爌字汝元一字我生邑梅洞人出嗣銅仁魚龍本族遂入銅仁籍明萬曆時舉人補宜章知縣母喪服闋改知淳化天啓七年擢蘭州知州所至並有名迹尋以父憂解職嘗還邑梅省親居宅在青岡林舊饒竹樹川原之勝吟咏自適意翛然也服滿起爲灤州知州崇禎三年邊關失利寇圍灤州急爌衣冠北向再拜泣曰灤州塊土小臣死守三月奈降者逃者難以義激臣

嫌謹以一死報國乃索筆題詩於州堂壁辭曰外寇橫臨日惟  
懷抗節誠忠肝原不死壯志恐偷生鳳闕殊恩重鴻毛此命輕  
邊關諸將吏何以報吾明書畢以劔自刎死時三月初三日也  
事定禮科給事中盧兆龍禮部尙書李騰芳大學士閔洪學先  
後疏奏邊城死難諸臣鄭國昌及嫌等七人詔贈嫌光祿寺少  
卿

志曰自漢世纍深孟獲之倫代長南中其後唐宋置羈縻州以  
千百數元明承之大建土官初皆其地大人豪傑自相雄長朝  
廷因之以柔以懷首招討使秩比從二品次宣慰次宣撫次安  
撫最下長官司焉楊氏資累世之基蔭值中原之仇離乘釁僥  
險奮起雲合光輔蒙藉蒿翳材非經武然其攘亂定功鉏刈非

族稜威霜厲蠻落星奔誠亦偏徼之雄鷲一時之雋民光彤光  
隆並轡齊驅抑其亞也爾迺版章式啓埃氛載清馳角荒倉號  
令獲蚤朱旗晨舉則綠萑夕靜不毛東驚而淫癘西潛由是考  
基定宇三洞並建神京道塞朝命靡通故有宋以還年更數百  
一隅擾攘史臣無述又越百年肇聞中國分土命職品制爰昭  
蓋荒闕窅冥厯世已數傳矣若夫同仇偕作煒其戰伐之勳師  
出無歸愍焉國殤之義五百年中忠義材武之選代有其人於  
序盛已當是時東盡溲澗西迄黔播南引思邛北連散毛地方  
千里谿峒蟠紆夫山川之氣猶閱詩書之澤未通而衣冠人物  
輝映先後若宇蒼鳳噓而寥翔和甫颺飛而茂績大田之效節  
疆場灤州之哀吟盡命皆蘊靈表異蔚爲時楨植根窮壤擢芳

華宇矣然則國殊內外生才則一年時縣邈湮滅尤眾也方雍正時芟薙西南土夷楊氏輸版不煩一兵故石耶猶予給土千總世職至今無改通晟之澤可謂長矣他若恃險稽誅稱師拒命亡率土之誠昧無外之義卒之煙滅塵絕宗祀不存身僇名喪子孫爲虜邱墟滋其永歎百世炯其殷鑒也

秀山縣志卷十三

卷十三

土官志

十四